

HOOFSTUK 30. PSALM 119 EN SY ONDERWYS

"Hoe lief het ek, U wet; dit is my bepeinsing die hele dag. Aanskou dat ek U bevele liefhet. Ek het hulle baie lief." - Ps. 119:97,159,167

In die Heilige Skrif is daar een gedeelte wat geheel en al daaraan gewy is om ons die plek te wys wat God se Woord as prioriteit by ons moet inneem, en die weg waarlangs ons die seën kan verkry. Dit is die langste hoofstuk in die Bybel, en byna sonder enige uitsondering vind ons dat in elkeen van sy 176 verse, onder verskillende benamings, melding gemaak word van die Woord. Elkeen wat werklik wil weet hoe om sy Bybel te bestudeer volgens God se wil, behoort 'n noukeurige studie van hierdie psalm te maak. Daar behoort 'n tyd in sy lewe te kom wanneer hy besluit om die onderrig daarvan te bestudeer en dit **uit te leef in die praktyk**.

Hoe verbaas kan ons wees dat ons Bybelstudie nie meer geestelike wins en krag meebring nie omdat ons die Goddelike voorskrif wat dit ons aanbied vir daardie studie, verwaarloos? Dit is moontlik dat jy dit nooit as 'n geheel deurgelees het nie. As jy nie die tyd het nie, maak dan die tyd, moontlik 'n vrye uur op die Sabbatdag (of waarom nie 'n vrye uur op 'n weekdag nie?) waarin jy dit dan deurlees en probeer om die hoofgedagte daarvan op te neem, of ten minste om die gees daarvan in besit te kry. As jy dit moeilik vind om dit te doen deur een keer se lees, lees dit meer as eenmaal. Dit sal jou die behoefte laat voel om dit meer noukeurig te oordink. Die volgende wenke mag vir jou tot hulp wees in die bestudering daarvan:

1ste: Let op al die verskillende **name** waarmee van **God se Woord** gepraat word.

2de: Let op al die verskillende **werkwoorde** wat uitdruk wat **ons behoort te voel en te doen** in verband met die Woord. Laat dit jou daartoe bring om noukeurig te oorweeg watter plek God se Woord in jou hart en lewe opeis, en hoe elke vermoë van jou wese – verlange, liefde, blydschap, vertroue, gehoorsaamheid en handeling – daardeur opgewek word.

3de: Tel en let op hoeveel maal die skrywer in die verlede tyd daarvan praat dat hy **God se getuienisse gehou, bewaar, daarby gebly** en hom daarin **verlustig** het; hoeveel maal hy in die teenwoordige tyd uitdruk hoe hy hom **in God se wet verlustig, dit liefhet en waardeer**; en dan hoe hy in die toekomstige tyd **beloof en die gelofte maak om God se bevele te onderhou** tot die einde toe. Sit dit alles

bymekaar en let op dat hy meer as honderd keer sy siel voor God stel as **een wat God se wet eer en onderhou**. Bestudeer dit veral waar hierdie uitdrukkings betrekking het op sy gebede tot God, totdat jy 'n duidelike beeld het van die **regverdige man wie se ernstige, kragtige gebed groot uitwerking het**.

4de: Bestudeer dan die gebede self en maak aantekening van die verskillende versoeke wat hy doen met betrekking tot die Woord, of dit is vir die onderwys daarvan, om dit te verstaan en die krag om dit uit te voer, of om die seën wat in die Woord belowe word en wat gevind word in die doen daarvan. Let veral op sulke gebede soos: "*Leer my U insettinge,*" "*Gee my verstand.*" Ook dié waar die versoek gedoen word "*na U Woord.*"

5de: Tel die verse waarin daar enige verwysing voorkom na **beproeving**, of dit voorkom uit sy eie toestand of van sy vyande, of die sondes van die goddelose, of God wat talm "*om hom te help,*" en leer dat dit **veral in die tyd van moeilikheid is dat ons veral behoefte het aan God se Woord**, en dat dit alleen ons **vertroosting** kan bring.

6de: Dan kom een van die belangrikste dinge. Let daarop hoe dikwels die voornaamwoord U, voorkom en hoe dikwels dit veronderstel word in versugtinge: "*Leer my,*" "*Maak my lewendig,*" en jy sal sien dat die **hele psalm 'n gebed is wat tot God gerig is**. Alles wat die psalmis te sê het omtrent die Woord van God, of dit is met betrekking tot sy eie gehegtheid daaraan of sy behoefte aan God se onderwysing en lewendmakende krag, word na Bo in die aangesig van God uitgespreek. Hy glo dat dit aan God welbehaaglik is en goed vir sy eie siel om sy oordenking en gedagtes omtrent die Woord so gedurig en so noukeurig as moontlik deur gebed met die lewende God self te verbind. Elke gedagte van God se Woord, in plaas van hom weg te trek van God af, lei hom na gemeenskap met God.

Die Woord van God word vir hom die **ryke, onuitputbare bron tot die hou van gemeenskap met die God van Wie dit afkomstig is** en na Wie dit bedoel is om hom te neem. Namate ons trapsgewyse 'n insig kry in hierdie waarhede sal ons 'n nuwe betekenis kry uit die enkele verse. En wanneer ons van tyd tot tyd 'n hele paragraaf met sy agt verse neem, sal ons vind hoe hulle help om ons op te hef, met en deur die Woord, na God se teenwoordigheid, en na daardie lewe van gehoorsaamheid en blydschap wat sê: "*Ek het gesweer, en dit gehou, om U regverdige verordeninge te onderhou,*" (**Ps. 119:106**), "*Hoe lief het ek U wet; dit is my bepeinsing die hele dag.*"

(Ps. 119:97).

Laat ons soek om, deur die genade van die Heilige Gees, die gebedslewe wat hierdie psalm openbaar, in ons môre-uur te laat inwerk. **Laat God se Woord elke dag, en voor alle ander dinge, ons na God lei.** Laat elke seën daarin 'n saak van gebed wees, en veral ons behoefte aan Goddelike onderrig. **Laat ons sterke gehegtheid daaraan ons kinderlike pleitgrond en oortuiging wees dat die Vader ons sal help.** Laat ons gebede gevolg word deur die gelofte dat, namate God ons lewendig maak en ons seën, ons die weg van Sy gebooie sal bewandel; en laat alles wat God se Woord aan onself meedeel, ons meer ywerig maak in ons verlange om daardie Woord oor te dra na ander, of dit nou is vir die opwek of vir die versterking van die lewe van God in die siel.

Gebed: Here God, hoe lief het ek U Woord, ek dink heeldag daaroor. Leer my volgens U Woord. Maak my lewendig volgens U Woord. Leer my U insettinge. Gee my verstand. Ek wil U ken en U Woord gehoorsaam. Amen.